

« en quelque lyeu, a perpetuelle memoire, mesmement  
« que en icelles lames et tables y a parolles servans a  
« congnoistre l'ancienne dignite de ceste ville de Lion et  
« que pour ces causes il a traicte avec led. Roland pour  
« avoir lesd. tables, faignant tontesfoys que c'estoit pour  
« luy mesmes, a ce que icelluy Roland ne teint le pris  
« plus roydde, s'il sentoit que la ville eust desir les avoir,  
« et tant a fait avec le moyen et aide de s<sup>r</sup> Hucgues de la  
« Porte que icell. Roland s'est joinct a les bailler pour  
« cinquante huit escuz soleil que ne seroit grande despense  
« a la ville, veu que le metal que poyse six quintaulx  
« trente livres, vault a fondre trente deux ou trente quatre  
« escuz, et auroit la ville, non sans cause, grand regret si  
« lesd. pieces estoient transportees ailleurs ou si elles  
« tomboient en main de quelque ung que par faulte d'en-  
« tendre que c'est les mist en fonte, et que si elles  
« demeurent icy et seront affigees en lieu ou les gens  
« savans en puissent avoir la lecture, ce sera grande conso-  
« lation aux gens de la ville quant ils verront ung certain  
« tesmoygnaige de la dignite de leurs majeurs et servira  
« d'eguillon a vertu pour imitation desd. majeurs et daven-  
« taige grand honneur a toute la ville, pour ce que quant  
« les bons seigneurs et savans personnaiges par cy passans  
« verront que la ville tient bon compte de l'anticquite  
« qu'est a venerer et des choses doctes auront iceulx passans  
« presumption vehemante que icelle ville est munye de  
« gens de bien, quoy ouy, mess<sup>rs</sup> les conseillers ont advise  
« d'aller ensemble veoir lesd. lames, lesquelles ils ont  
« veues en ce mesme instant et avoir entendu et sceu que  
« ledit Roland ne veult rabatre aucune chose de lad.  
« somme de cinquante huit escuz sol., ont pour la ville  
« retenu lesd. tables pour les causes susd., lesquelles sur le